




Александр Некрасов
ГОРД ТУГЪЯСА
ПЕЛЫСЬ



95 04 расш.с.
9811 Александр НЕКРАСОВ

с/коми
Н48



Гөрд тугъяса пелысь

Кывбуръяс

253016

СП АВОЧНО-
библиографический отдел
Сыктывкар
Коми книжной издательство
депской библиотеки имени
С. П. МАЛЫШЕВА
1983

Некрасов А. В.

Н 48 Гөрд тугъяса пелысь: Кывбуръяс.—
Сыктывкар: Коми кн. изд-во. 1983.
96 л. б.

Том коми поэтлөн тайö, позьö шуны, медводдза аслас торъя книга. Таöдз сьлөн коминас петавліс ыджыд кывбур чукöр «Куим сьыланкыв» нима книгаын (куим поэтлөн öтласа гижöд чукöр) да рсчöн «Гамма» книгаын ыджыд поэтической тет-радь

«Гөрд тугъяса пелысь» книгаас авторыс серпасалö челядь дырсö, том дырсö, но öттшöтш видзöдчö талунъяс да сьöлöмнас, пытшкөсса видзöдласнас йитö-öтвывтö важсö öнiякöд, аслысногөн петкöдлö Войвывнымöс, мортлысь ловсö лэптысь ёртасьöм, радейтöм.

А. Некрасов участвуйтліс странаса том гижысь-яслөн VII совещание вылын Москваын да челядь-лы гижысьяслөн совещание вылын Пицундаын.

84.3КО

Н 0743 — 004
М 128(03) — 83 30 — 83 м



Гажа овны быд вожын.
Немтор паныд ог шу.
Но ме войвывса пожом.
Мен оз лөсяв мөд му.



1

Ме чужи
война бөрын



КӨТЪ ВӨЛІ НА МЕ ИЧӨТ

Көть вөлі на ме ичөт,
Дас арысь эг мун ылө,
Бать та ылө эз видзөд
И нуліс видзьяс ылө.

И кыаыс на көнкө
Сэн нюжмасьö — эз мыччысь,
А ме нин пышъя көмтөг,
Сөдз лысваысь ог видзчысь.

Тадз унзіль менам бырліс,
Кор ытшканінö мунім,
И лэбач горөн тырліс
Сэк муса чужан муным.

А сэсса коса швичкис,
Сы бөрын босьтлі нарман.
И мудзөмлун, дерт, личкис,
Өд вөлі мен дас ар на.

Ки зөлитіс ва гаддысь,
И гортад өдва мунсьö...
Но аддзи сэки батьлысь
Ме чужөм вывсьыс нюмсö

ОБӨ

Сикт весьтөд
Лэбө самолётыд,
Ми, чой-вок,

Өвтчиг, пышъям йөр пыр...
А кильчө вылын
Бөрдө обө —
Фронт вылын усьөм
Лётчик гөтыр.

МЕ ЧУЖИ ВОЙНА БӨРЫН

Ме чужи
Война бөрын,
Пеж вөрөг мен эз лыйлы,
Эг төдлы кад —
Нянь шөрөм
Мед эз вөв пызан вылын.

Ме сөмын
Синмөс вості,
Пыр паныдаліс менө
Эз курыд шог,
Кыз водзті,
А чөдлач рөма енэж,

Веж луд выв,
Катшасинъяс
И сынөдыс — дзик ма кодь.
Кыз сэсса
Ошъян инад,
Он нюмъёвт өтвыв накөд.

Но мамөй,
Муса мамөй
Өд төдліс война көрсө!
А сідзкө,

Война пассö
Тшöтш новлöдла ме сьöрсьым.

МУСА МАМÖЙ, ШОНДІБАНÖЙ

Муса мамöй, шондібанöй,
Челядь керка тыр,
Некор тэнад найöс дінö
Муслуныд оз быр.

Муса мамöй, шондібанöй,
Винёв тэ, кыз бадь.
Ытшканінсьыд воывлан да,
Кыкнан киад гадь.

Муса мамöй, шондібанöй,
Тэ на би кодь яр.
Вирпас эм на чужöмбанад,
Кöть ветымын ар.

Муса мамöй, шондібанöй,
Статя тэ, кыз гум.
Бур йöзыслы лоан паныд —
Козиналан нюм.

Муса мамöй, шондібанöй,
Тэ öд рочакань.
Пызан вылад век эм банйöм
Кöвдум, черинянь.

Муса мамöй, шондібанöй,
Тэ, кыз визув шор.

Гөра воча сьökыд кайны,
Но он отсөг кор.

Муса мамöй, шондiбанöй,
Югыд кодзув тэ.
Пияныдлы туйсö индан,
Эз ылавны мед.

Муса мамöй, шондiбанöй,
Ыджыд тэнад лов.
Шондi улас, микöд танi,
Дырджыка на ов.

КЫР ЙЫВ ÖЛЬÖКСАН

«Ас кар вылын
Ачым ыджыд»—
Гажа ворсантор
Панам,
Исласьöмысь лыжөн
Дзикöдз
Умам кор.

Гөра йылын
Ёртным — Сашка.
Сийöс венны сэсь
Дасөн
Зiля каям-кашкам,
Сöмын ставыс —
Весь!

Тiмбылясям
Увлань юрөн,

Лым тупыльяс моз.
Юрад мөвпыд,
Быттьö пурö:
«Венны
Оз мөй позь?!»

Бара каям.
Қыскам, йөткам,
Да оз артмы нем.
Сійö сулалö сән
Өтнас,
Быттьö вужьяс
Эм.

Сійö некодлы
Эз сетчыв,
Код көть «тыш» эз пан.
Та вöсна и
Нимсö сетім —
Қыр йыв
Ольöксан.

Тайö вөлі
Ичөт дырйи...
Өні мөд ног гаж!
Сөмын сэсянь өнөдз
Пыр на
Нимыс сылөн
Важ.

Олан туйыс
Вөлі крут зэв,
Но эз пөр ни усь!
Ассьыс юрсö
Вылын кутö,

Бытьё
Эрд выв сус.

ОК ТЭ, МУСА ЧЕЛЯДЬ ДЫР

Ичөтдырся ёрт Н. Осиповлы

Гажөдчам кө —
Отлаын.
Купайтчам кө —
Сідз жө.
Асыв.
Мөсьяс вөтлалам,
Сэссия лунтыр видзам.

Пөжалыштам
Печенча.
Пось да,
Киад пөляв.
Зіля тэ моз
Велөдча
Гумйись вөчны пөлян.

Сёрнитам да
Сералам,
Быдтор йывсьыс сөрам.
Енэжыс кө
Зэрмылас —
Зорөд улө төрам.

Ошка-мөшка
Нюкыльтчас
Юысь юны васө
Ыджыд радлун

Бузгысяс
Миян съёлёмъясö.

Виччысьтөг кө
Пышъясны
Мөсьяс тыра йөрö,
Видам найöс
«Шышъясөн»,
Пöсявлö сэк дөрöм.

Рытнас
Кыям кельчияс,
Сэссия шöри юкам.
...Ок тэ,
Муса челядь дыр,
Медбур олан здукöй!

ВИСЬТАВЛЫВЛÖ БАБÖ

— Кутшöм сийö кадыс вöли, пиö,
Тэ, дерт, öнi бура он и тöд.
Дедыд мунiс воча враглы, биö,
Танi вöли олан көрыс мöд.

Гортад тшыгöсь — виччысьöны нельöн,
Пызан вылад абу тусь ни пызь.
Асывсяныыс тшыгөн найöс колян,
Эбöсыс нö налы сэссия-й кысь?

Кельдöдлiсны челядь менам дзыкöдз,
Отсавнысö нинöмөн ог куж.
Но друг кыли: «Воим ми Берлинöдз,
Петкöдлим пез Гитлерыдлы пуж».

Сьӧлӧм менам радлунӧн пыр ойдӱс,
Лоӧ, мися, челядь, нянь и шыд,
Но лӧк юӧр бара сьӧлӧм дойдӱс:
«Врагкӧд косьын уси верӧсыд»!—

Мунис нин войнаыд, важӧн абу,
Сӧмын менӧ босытлывлӧ на шог,
Кодыр меным висытавлывлӧ бабӧ
Ассыс войнадырся оланног.

ВИЧЧЫСЯ МАМОС

Ме ола бокин,
Интернатын,
Мен регыд дас ӧти нин тырӧ.
Но муса мамӧй
Абу матын,
И менам ӧна
Гажӧй бырӧ.

Ӧд мамыд
Сийӧ абу тьӧтӧ,
Ас челядыдлы кӧсийӧ бурӧс.
Ог прӧста аддзы
Сийӧс вӧтӧн,
Кыз морӧс бердас
Кутӧ юрӧс,

Кыз ньӧжйӧ,
Мелӱа мен вашкӧ:
«Вен, пиук, кызкӧ ассыд шогтӧ,
А бурдышта да,
Сэки, гашкӧ,

Бөр лэдзас врачыд
Менө гортө.

И бара миян
Лоо гажа,
Кор тэнө, пиук, босьта татысь ..»
Но колис во
И кык нин важөн,
А мам оз босьт век
Интернатысь.

Ме сійөс виччысьны
Ог дугды,
Мед усьо лым, көть зэр ва киссьө.
Ме төда,
Туйыс мамлы югдө,
Кор сійө венас
Ассьыс висьом.

АРСЯ ЛУН

Талун асылыс
Зумыш да нор.
Енэж кымөра помтөг и дөртөг.
Кыз пу чаль вылын
Медбөрря кор.
Арся шондыс
Югнитлас коркө...

Бара мөдөдчис
Шливгыны зэр,
Кисьтө, быттьөкө коялө көшысь.
Вежсис гөгөрыс

Муыслөн сер.
Бөрдө дугдывтөг
Пемдыштөм өшинь.

ВОИС ТӨВ

Еджыд бобувъяс — лым чирьяс
Лэбалёны ворсігмоз...
Еджыд шапкаасис дзирья,
Еджыд дөра вевттис пос.

Дзормис веж тугана пожөм,
Дзормис Эжва дорса рас.
Чизыр төлыс пунктис чожа
Өшинь вылө кырымпас.

РЫТЪЯ ШКОЛА

Көдзыд төв йылын
Уджала лун,
Рытнас тэрмасиг школаө муна.
И ог төдлы,
Кыз сывйыштас ун,
Кызди төдлытөг
Партаө суна.

Бытгьө лемасьö —
Тупкысьö син,
Киөй свинеч кодь, гижнытө сьökыд.
Ёртөй тувкнитас:
«Мый унмовсин?!»—

Татшөм тувкөмсө
Кывла ог өтчюд.

Бөр ме веськөдча,
Кыпөда юр,
Гижны тетрадьö босьтчыла яра.
Сөмын ручкалы
Туйыс оз сюр,
И ог төдлы,
Кыз сунгыся бара.

Сьөкыд мудзөмтө
Некыз он пык,
Көть и шойчыны шедлывлө лун-мөд.
Быд рыт велөдчиг
Первой час кык
Ёна мучитө
Быдөнөс унмыд.

Но, а сы бөрын
Личалө сой,
Юрөй палялө, дөрөм сос пуджа.
И көть өшиньö
Видзөдчө вой,
Босьтча сьөлөмсянь
Велөдчан уджө.

Өдйө котөртас
Медбөрья час,
И ми ёртьяскөд разалам гортө!
Тадз ме помавлі
Дас өти класс,
Тадзи вочасөн
Лои ме мортөн.

ШЛЯЧА

Бара ывла вылын шляча,
Сөнікассьö лым...

Кор нин волас бара татчö
Первой тувсов гым?..

Ёна виччыся ме сійöс,
Медым кылас тан,
Шоныд зэръяс ваяс сывъяс,
Вежас олöм бан:

Джуджыд турун петас водзвыв,
Быдмас катшасин,
Сэтшöм мича лоö войвыв,
Мый оз эскы син.

Но, а öни шляча усьö,
Сөнікассьö лым...
Көнкö матыстчö нин гусьон
Первой тувсов гым.

МЕ ЛЕНИНГРАДЫН ÖНИ ОЛА

Ме Ленинградын öни ола,
И Нева дорö частö вола.
Кор муна-восьлала сы пöлөн
Ме, Войвыв муысь коми морт,
Сэк помтöг радлö менам сьöлöм:
Тат ветліс Пушкин — ыджыд ёрт.
Невалысь аддзыліс лöz гыяс,
И чöла кывзіс сылысь шыяс.
И видзöдлывліс ылö водзö,

2. Гөрд тугъяса пелысь

Гөрд кыа ломалис на кыт,
И шулис: «Аддзыны нин поэьо,
Мый гөгөр ыджыдалө рыт.
Ак, кутшөм өдийө вежсьө ставыс,
Ак, кутшөм өдийө лэбө кадыс!
Со воліс лун и абу важөн,
Сы пыдди аски локтас мөд
И тыртас сьөлөмъяс мөд гажөн,
А, гашкө, шогөн... он өд төд».
Поэт тадз мөвпавлывліс уна,
А өні ме нин таті муна.
Нева век шлывгө аслас өдөн,
Ме төда, сійө уна төдө,
Но висьтавыны оз вермы нинөм,
Та вылө сылөн абу сям.
И таысь менам гений дінө
Пось муслун содө, а оз ям.

ТЭРМАСЯ ГОРТӨ

Со талун помтөг зэрө бара,
Кыз кымөр вевттис енэж от,
И Ленинградсянь Сыктывкарө
Оз лэб та вөсна самолёт.

Оз лэб, оз сійө, морыд, тэрмась,
А менам гортысь бырис гаж.
Лун мысти, сөмын на пө, вермас
Тась курссө босьтны экипаж.

Дзонь лун ме нөшта ола татөн,
А аски гортын лоа рад.
И оз ло Невскөй мекөд матын,
Зэв ылын лоө Ленинград.

Ме муна карса улич вывті,
Мен тӧдса паныдасяс ёрт.
Ме сылы воча «чолӧм» кывтӧ
Ог вунӧд шуны коми морт.

И Эжва ю бокӧ ме вола,
Сэн тӧдса кызлы мычча ки
Да шуа: «Кызди, чоюк, олан,
Ӧд дыр эг аддзысьлӧй нин ми?..»

Ме асывводзӧдз ог пыр гортӧ
И аддза, кызди садьмӧ кар.
И бара важ моз, кызди коркӧ,
«Бур асыв,— шуа,— Сыктывкар!»

КОМИ ЙӦЗ

Оз ышнясьны комиад йӧзыд,
Оз лэптавны тэ водзын ныр.
Кор овлывлӧ тӧвъяснад кӧдзыд,
Кӧть код ордӧ шонтысьны пыр.

Тэн вевттясны пызантӧ здукӧн.
Кӧть тӧдса ли тӧдтӧм — тэ сӧй.
Быд тасьтӧын сӧяныд чукиӧн,
А сы бӧрын тэныд бур вой.

И узян тэ тӧдтӧм йӧз ордын,
И думайтан: «Овлӧ тай со,
Ӧд тані ме дзик быттьӧ гортын,
Кӧть гортӧдз на, тӧда, эг во».

МИ ТЭКӨД

А. Поповлы

Ми тэкөд
Коми мулөн пиян,
Ми тэкөд
Прөстөй коми йөз,
И овлө долыд вывті миян,
Ми весьтын кодыр
Енэж лөз.

Ми тэкөд
Коми мулөн пиян,
Ми тэкөд
Чужим-быдмим тан,
И пөся радейтам
Россия,
И некор муслунным
Оз ям.

Ми тэкөд
Коми мулөн пиян,
Ми төдам
Шудлуныслы дон.
Кор ковмас,
Мунам воча биё,
Кыз коркө мунліс
Коми зон.

Ми тэкөд
Коми мулөн пиян.
Көть кытчө
Олөмыс оз ну,
Век лоё

Сьӧлӧманым миян
Ас чужанінным —
Коми му.

КОМИ КЫВ

Қоми кывйын эм пармалӧч шы,
Паськыд, туруна эрдъяслӧн баныс.
Қоми кывйын эм Эжвалӧн гы,
Қодлӧн енэжысь лӧз овлӧ ваыс.

Қоми кывйын эм колиплӧн гор,
Қоді меліа дугдывтӧг сьылӧ.
Сійӧс рытьяснас кывзан тэ кор,
Бытьӧ морӧсад сьӧлӧмыд сылӧ.

Қоми кывйын эм тувсовъя кад,
Қодыр серпассӧ вежлывлӧ ывла,
Вӧччӧ дзоридза платтьӧӧн сад,
И он тӧд сэки, долыд тэн мыйла.

Қоми кывйын эм вӧр-валӧн кӧр,
Қодысь век менам гажмывлӧ юрӧй.
Қоми кывйын эм дадюла кӧр,
Қоді лым еджыд тундраті вурӧ.

Қоми кывйын эм востымлӧн сер,
Қодлысь став рӧмсӧ войвывным ӧктӧ.
Қоми кывйын эм медводдза зэр,
Қоді ӧддзӧмӧн туй вывті йӧктӧ.

Қоми кывйын эм шонділӧн дзирд...
Эз ӧд прӧста мем сэтшӧма мусмы!

И ме эска, мый сійӧ оз чир
Да и уна во мысти оз чусмы.

КОР ЛОКТА АСЛАМ СИКТӦ

Кор локта аслам сиктӧ,
Ме сэтӧні век ас,
Оз некод ӧдзӧс сипты,
Оз некод пукты тас.

А мӧдарӧ на — воча
Со быдӧн мыччӧ ки.
И кыла: «Волан шоча
Тэ ми ордӧ, бур пи».

А менам нюмӧй петӧ,
И сьӧлӧмӧй зэв рад.
Со бара кисьмӧ сэтӧр,
Со бара гоҗся кад.

Ме аски босьта коса
Да мудзтӧдз ытшка дыр.
«Тэ ытшкан, быттьӧ ворсан»,—
Мен мамӧ шуас пыр.

Ме кӧсья пӧттӧдз мудзны,
Эг важӧн мудзлыв ӧд.
А сэсся бура узыны
Да вӧтавны бур вӧт.

Мен долыд, кор ме вола
Да аддзыла ас сикт.
Ме сэні вежон ола
И томӧн лоа дзик.

СТРАДНА

Эг ме садьмыв некор сёрон,
Медым шонді ёрис син.
Кыа ломзяс, батьой коро:
«Ноны, пейй, чеччы нин».
Дыр ог нюжмась, чечча, мыссия,
Юа няньон стокан йов,
Сэссия пасьтася дай кыссия
Батькод видзьяс выло чов.
Сомын товру польто надзон,
Эзысь лысва мысько кок,
Коть и гач кокой нин вазис,
Меным лосьыд — абу шог.
Час, а, гашко, дырджык мунам,
Воас паськыд, гажа эрд.
Зород тыр ми ытшам луннад,
Коть и ёна мудзам, дерт.
Кыпыд уджас босьтчам кыдзи,
Кысьтам батькод сымда пось,—
Босьт коть доромто да пыдзырт,
Ведрa ваыд петас сэсь.
Талун лунтыр ытшам-овтам,
Аски лоо мод ног удж,
Турун косьмас, сабри човтам,
Сэссия-й мод видз выло вудж.
Быд лун ньылём лэччо вожон,
Мудзло дзенавтодз и сой,—
Коді дышодчывло гожом,
Сийо товнад йов оз сёй.

●

Асывводзнас аски
Чечча водз.
Тодса борті лэчча Эжва дорё.
Сөстөм васё юа
Өти содз,
Купайтча и
Мөдөдча бөр гортө.

Ыркыдінысь босьта
Кринча йөв,
Пуртөн вунда банйөм небыд көрыш.
Өшинь — гурйыв.
Ворсё вильыш төв.
Гажа садлөн
Кылө чөскыд көрыс.

Талун сьөлөм
Сэтшөм лөнь да чөв,
Бытьё ты, код шойччө бушков бөрын.
Сёя нянь
И юа кружка йөв.
Пасьтала выль мыськөм
Еджыд дөрөм.

Ордым-визьті
Муна, гашкө, час,
Сэсся воа тодса видзьяс шөрө.
Ытшка сэтчөдз,
Қытчөдз енэжтас
Қыанас оз өвтышт:
«Гортад пөра».

Рытъя сиктö пыра —
Шы ни тöв.
Вочаасьлас мусукасян пара.
...Важөн нин зэв
Придашын эг вöв.
Таво сукöд
Аддзысьла ог бара?..

ОН СУВТÖД ВОЯСТÖ

Он сувтöд воястö,
Кыз вöвъясöс,
Кор найö гөнитöны скач!
Эг некор аддыв
Ассым пöльясöс,
А мыйла артмис эськö тадз?..

Öд налөн
Ловъяöсь на гöтыръяс:
Кык Ольга — менам кык бур пöч.
На йылысь он шу —
Чукля мöтыръяс,
Кöть кадыс накöд
Мый эз вöч...

Гöрд кодзувъяса
Джуджыд керöсьяс
Россия пасьта сэн и тан.
Сэн дона пöчöяслөн
Верöсьяс,
Сэн менам дедъяс —
Кык И В А Н.

БАБӦ

Бабӧ олӧ сиктын,
Тыртӧ квайтӧд дас.
Кутшӧм удж он ликты,
Сэн эм сылӧн пас.
Страдна дырйи ытшкӧ,
Том йӧзысь оз коль.
Кочӧгыс оз бытшкы,
Шойччӧг оз жӧ доль.
Шуньгас арлань гожӧм,
Вотӧс петас тыр.
Вӧрад ветлас чожа,
Эбӧсыс оз быр.
Но, а кӧдзыд тӧвнас
Шойччан кадыд эм,
Сӧмын татшӧм мӧвпьяс
Баблӧн абу нэм.
Рака лоскысь турун
Кыскӧ сылӧн вӧв.
Чӧсмасяс мед Сюрунь,
Лысьтас унджык йӧв.
Рытнас вурун печкӧ,
Кепысь корӧ внук.
Шойччыштны, дерт, эськӧ
Баблы колӧ здук.
Но оз кӧсйы сйӧ
Некор овны весь:
«Нинӧм,— шуас,— пиӧ,—
Бурыс абу сэсь».
Век тадз мыйкӧ вӧчӧ,
Оз и ланьтлыв сутш.
Олӧ-вылӧ пӧчӧ —
Эм пыр сылӧн удж.

ҚОР ГӨСТИТА МЕ РӨДВУЖ ОРДЫН

Қор гөстита ме
Рөдвуж ордын,
Ог пукав сөмын пызан сайын.
Эм парма,
Сәні дедлөн ордым,
Қод меным ыджыд радлун вайё.
Со пуяс вылын
Төдса пасъяс.
Быд пас мем ликтө дедлысь овсё:
Эм коми мортлөн
Лэч туй аслас,
Йёз пөтка кыйтөг сылы овсёё.
Зэв тшөкыда ме
Татчө вола,
Өд сёла-тарыд тані уна.
А тшакыд...
Чукөрт — пу и солав,
Дай нөшта чой-вокыдлы ну на.
Коз пулөн лапыс
Лысва молля.
Кыз инмөдча, сідз сикөтш киссёё...
Қор муна гортө,
Вөрсө коля,
Дзонь төв чөж оз босьт менө висьём.
А кадыд...
Сійө лэбё водзё,
Быд векни ордым тыртны аддзё.
Но, кыз и дедёй,
Асывводзын
Ме бара мөд во локта татчө.

ОК, ЭЖВА, ЭЖВА...

Ок, Эжва, Эжва,
Мыйта ва
Тэ нуин сиктъяс пӧлӧн..
Но век на помнитсьӧ
Война,
Код дойдіс
Уна сьӧлӧм.

Со паныдасис
Фронтӧвик,
Код пӧдтіс война бисӧ.
Ме сылы мыччи
Веськыд ки,
А сійӧ —
Шуйга кисӧ.

ВИДЗ ВЫЛЫН

*Александр Иванович
Некрасовльи*

Ытшкы зільджыка,
Педул Саш,
Ӧдсӧ лӧдсалышт нӧшта, нолы,
Медым видз вылыс
Тӧдлас гаж,
Ытшкан сямнымӧс
Гӧгӧрволас.

Ссылӧй, косаяс,—
Швуч да швич!

Қотась ньылөмөн, ситеч дөрөм,
Мича уджыслы
Радлө видз.
Турун —
Гы бөрся гы моз — пөрө.

Ытшкөм помассяс
Миян кор,
Чөвтам мичасьыс-мича зорөд.
И сэк мөдөдчам
Сьылігсор
Дона Кырулө,
Эжва дорө.

ДЕД

Менам дедөй өтнас кыйліс ош,
Сьөла-тартө гортас вайліс тырыс.
Ачыс пельк, а кокыс тэрыб-чож,
Ковмас, мунас би пырыс, ва пырыс.

Джуджыд керка зымнитлөма дзик
Сэтчө, көні Эжва матын-матын.
И код төдас, гашкө, миян сикт
Медводз вужсө буретш лэдзліс татөн.

ШОФЕР

*Ипатовской лесопунктысь шо-
фёръяслон комсомольско-моло-
дёжной бригадаон веськөдлысь,
коммунистической уджвывса
ударник Александр Козловлы*

Кодкө му пытшкысь
Перйө газ,
Кодкө тундраын
Көръяс видзө,
А тэ новлөдлан
Вына «МАЗ»,
Он асфальт вывті —
Вөр туй визьөд.

Асья кыаыс —
Кисьмөм оз.
Чөла узьö на
Вөр посёлок,
А тэ руль сайын —
Лесовоз
Кыскө вөр,
Сійö ёна колö.

Водзö котөртö
Наян туй:
Кежлас бокö,
То енэж пыкö.
Бытьö гажмöма,
Йöктö руль,
Нöшта поводдя —
Друг дай —
тшыкö.

Но век ас кадö
Воö вөр
Парма шөрсянь да
ЛПК-өдз.
Төдан уджыдлысь
Дор и шөр —
Тайö вермөм и радлун
Вайö!

АФРИКАН

Эм мян сиктын Африкан,
Ветымын таво тыри.
Кор сы вылө тэ видзөдлан,
Век мунö чотігтырйи.
Ми ставөн төдам — фронтөвик
Войналысь төдліс лөксö,
Кор сійö пидзөсөдзыс дзык
Ён тышын воштіс коксö.
Мед вөлі синва, вөлі дой,
Код бурдны эз нин вермыв,
Мед узьтөг кольліс уна вой,
Но сійö эз, эз нэрмы.
Ас чужанінас локтіс бөр,
Көн виччис пөрысь мамыс,
Да бара киас босьтіс чер,
Мед отсавны страналы.
И олөм пуис, колис кад,
Со талун ассьыс писö
Служитны колльөдö салдат
Да пөся жмитö кисö.
Медальяс морөс вылас тыр,
Кыз вөрзяс — зөлякылö,

Мый тышын, уджын вöлі пыр,
Награда вичмис сылы.
Тадз олö сиктын Африкан,
Тöлкөвöй дядьö — юра.
«Кыз олан-вылан?» — юавлан
И кылан: «Медся бура!»

НЕКРАСОВ ВАД

Дерт, ставсö вуштö кад,
Öд олöм водзö мунö.
Но эм Некрасов вад,
И сийöс ме ог вунöd.

Сэн нэмсö кыйсис дед,
Век гортö вайліс чери,
А тыс эз тыр мед,
Бадь кустьяс ректіс черөн.

Эз пыжнас некор пыр,
Көн йöзлөн вöлі коляс,
Кöть чери гыбзьö тыр,
Оз вөрзьöd, сідз и коляс.

Век тöдліс ассые туй,
Сы визьöd век и ветліс,
А йöзö ныр эз суй,
И завидыс эз петлы.

Дыр кежлö кольліс горт,
Ми гажтöмчывлім быдөн...
Мый уджач вöлі морт,
Ас сиктын тöдö быдөн.

Кыдз парманымлөн пи,
Вөр-вакөд йитліс ловсө,
Та вөсна өні и
Эм ты, код новлө овсө.

Дед важөн абу нин,
Оз тыс дорын довъяв.
Но олө тылөн ним,
И дедным быттьө ловъя.

ТШАКА ЗЭР

Талун суис менө ыджыд радлун,
Вежсис быдөн менам чужом сер.
Сы вөсна, мый войвыв парма-садлы
Поводдяыс вайис тшака зэр.

Кисьтө зэрыс, дугдывлытөг кисьтө!
И көть эськө ывла вылыс руд,
Некоді оз норась ни оз висьтав,
Татшөм луныс дзескөдө мый шуд.

Пуяс вылын гырысь лысва моляс
Сөстөмөсь, кыдз быттьө синва войт.
Зэра луныс миянөс кор коляс,
Вөрыс лоө збыльысь гажа мойд.

Веж лыс улө петас мича ельдөг,
Мыччас гөгрөс юрсө дона гоб.
Асывнас, кор енэжтасыс кельдө,
Вөрса гөснеч вотны өдйө лок.

Пестерыд и падъяныд пыр тырö,
Но, а кöдзыд тöлыд воас кор,
Қазьтас тэныд гулыд ягö пырöм
Пызан вылад вайöм чöскыдтор.

ШОНДІБАН

Қор батыöй видзьяс вылö мунö,
Оз уна сёрни пан.
Но некор шунысö оз вунöд:
«Бур асыв, шондібан».

Водз асыв мамö дасьтис пачсö,
Мед пöжавны пöсь нянь,
Да кевмö, выйöн мавтіг рачсö:
«Мед артмас, шондібан».

Со Анна тьötö вöрысь петіс
И бара кылам тан:
«Ен вотöстор мен, майбыр, сетіс,
Сё аттьö, шондібан».

Том баты кöляска надзөн гургö,
И радлуныс оз ям,
Став сиктным кузя ставлы юргö:
«Пи чужис, шондібан».

Морт олан туйыд абу мольыд,
Эм сылөн гуг и бан.
Но сьöкыдлун йылысь ог дольöй,
А олам, шондібан!

МЕ БЫТТЬӨ ТӨРЫТ ВӨЛІ ИЧӨТ .

Ме быттьө төрыт вөлі ичөт,
И сэки шуліс меным бать:
«Со, пиё, өшинь улын, видзөд,
Дзик тэ кодь быдмө дзоля бадь.

А коляс кад, и быдмас сійө,
И сыкөд өттшөтш быдман тэ!»
И сідз и лои, өні киын,
Со, ассым пиёс кута ме.

СОДТӨД ПАСЪЯ

Батьтөг- мамтөг
Челядь дыр эз коль,
Дзоньвидзалун тшыгъялөм эз ну дай...
Сьökыдлуньяс йылысь
Ме ог доль,
Войнасө эг аддзыв,—
Сідзкө, шуда.

Сөмын содтөд
Пасья татшөмтор —
Менам челядь шудаджыкось меысь:
Дедъясөс эг аддзыв,
Чужи кор,
Челядьлөн жө найө
Эмось.

ГӨРД ОБЕЛИСКЪЯС

Эжва пөлөн
Лыдтөм сикт
И дзик быдын — шөрас
Сулалө
Гөрд обелиск
Доридзьяса йөрын.

Уна мортлөн
Сэни ов,
Кодлөн дедыс, батыс...
Быдөн пуктіс
Ассьыс лов
Көнкө ылын татысь.

Кодкө гөрліс
Ыб выв му,
Кодкө вөрын кыйсис,
Кытчөдз
Войнаыс эз ну
Шуда олөм сывсьыс.

Быд зон сывліс
«Шондібан»,
Радейтліс том нылөс,
И война кө
Враг эз пан,
Кымын свадьба кыліс?..

Өні узьө
Том салдат
Көнкө ылі муын,
И оз вермы сійө тат,
Сикт кузяыс, мунны.

Оз нин аддзы
Парма лыс,
Оз лок Эжва дінö.
...Дона Кремльлөн
Кодзулыс
Дзирдалö рублин.

ТАЙÖ МЕНЫМ И ШУД

Ссылöй, пожöмъяс,
 шувгöй,
Кывтöй, юясöй,
 шуньгöй,
И ме некор
 ог сувт:
Кута ссыланкыв
 сывны,
Шог и радлун
 век кывны —
Тайö меным
 и шуд!



2

Биа гөрд тугъяс



ОЛӨМ

Шуас кӧ кодкӧ:

«Кокни

Овны став олӧм чӧж...»

Шуӧмыс тайӧ — лӧк нин,

Шуӧмыс тайӧ — лӧж.

МИ ЧУЖАМ

Ми чужам

Мичаӧсь да сӧстӧмӧсь,

Кыз быттьӧ асья лысва войт.

Ог тӧдӧй лӧклунтӧ

Ни лӧжтӧ ми,

Син водзын олӧм —

Гажа мойд.

Но кызди

Верстяммам да мӧдӧдчам

Ас олан туйӧд мунны ми,

Сӧк аддзам

Завидьлунлысь кӧдзыдсӧ

И лӧжлысь

Сьӧлӧм сотан би.

И сӧки

Сьӧлӧмьяснас усьӧны

Зӧв унаӧн, кӧть мый тӧ вӧч:

Со ӧти тӧдса

Дзикӧдз юсьӧма;

Мӧд вӧлі збойӧн,—

Лои кӧч.

А коймөд
Олө-вылө-мөвпалө:
«Ог көсйы төдны нинөмтор,
Ті збыльсө корсьөй,
Асьныд йөйталөй,
А менам сідзи
Шоныд горт...»

Ми Позяломсянь
Петлім туяным
Зэв унаөн, а өні со
Морт нель-ө-вит,
Ен тышкад туйө на,
А таысь унаыс
Оз ло.

Ме ас ног водзө
Овны көсья на...
Ог кытчөдз кыз му улас вод,
Мед лóa мичаөн
Да сөстөмөн,
Кыз быттьө асья
Лысва войт.

ОЗЫРЛУН

Ме овла озыр,
А ог гөль,
Қор волөны ме ордө:
Бать-мамөй,
Дона пөч да пөль,
Чөй-вокьяс,
Төдса өртөй.

Кыдз пуксям
Пызан сайё — пыр
Гаж кыпөдчас
Да сэтшөм:
Став рытыс кольё
Сыылігтыр,
И тайё лоё этша.

И бара кыптас
Сыланкыв,
А сэсса сёрни пансяс.
Ог төдлөй,
Югдас ывла выв
Да суас
Пызан сайсьыс.

Быд мортлөн
Аслас озырлун.
А менам — бур йөз тайё!
Кыдз быттьё праздник
Овлө лун,
Кор аддзывла ме найёс.

ВЕК НАЙЁ БУРЁСЬ...

Век найё бурёсь,
Кодъяс чөлөсь!
Көть медым шөри потас му.
Он кыв тэ налысь
Скөрмөм гөлөс,
На пиысь некод
Кыв оз шу.

Да, найӧс некоді оз пиняв,
Да, найӧс некоді оз ёр,
Оз некод «лыдды»
Налысь пиньяс,
Ӧд найӧ чӧлӧсь,
Кӧть мед кор...

Му вылад йӧзыд
Уна пӧлӧс,
Оз кутшӧм сӧмын мортыд сюр!
Но кодлӧн абу
Аслас гӧлӧс,
Кыз вермас сійӧ
Лоны бур?..

СӖВЕСТЬ

Сӧвестыд пиньтӧм,
А йирӧ:
Эг куньлы ме
Асылӧдз син,
И сӧнъясын
Кӧдзавлӧ вирӧй,
А сьӧлӧмӧй
Оз аддзы ин.
И ачымӧс
Кывъясӧн «мыйла»
Ме дугдывтӧг
Юася-луйла:
«Мыйла?»
«Мыйла?»
«Мыйла?»
Но мыйла ме

Тадзисö вöчи,
Ас вежöрлысь
Гöлöс эг кыв?
Зэв скöр йылысь
Эг кутчысь öтчыд
Да бур мортлы
Шуи лёк кыв.
А кывйыд
Öд абу руд пышкай!
Лэбас кö —
Бöртö он кут.
И жаль,
Кодыр сылön
Эм пытшкас
Лёк выныс,
Код пасьнитö шуд.
...Зэв сьökыд,
Кор дойдасны тэнö,
Сэк мучитчан майшасигсор.
Но сьökыдджык
Сэтшöмтор венны,
Кор тэ вöсна
Доймö бур морт.

ОГ РАДЕЙТ

Ог радейт,
Коді гöльö пуксьö:
Оз ньöблы прамöй пась ни кöм,
А нэмсö сöмын
Чöжö гусьön,
Оз тöдöмлун,
А унджык сьöм.

И веськавлан кӧ
Татшӧм ордад,
Кӧть сійӧ тэныд, гашкӧ, рӧд,
Оз тэнӧ вочаав,
Кызд ёртӧс,
Оз ёна варовитны мӧд.

И тэ кӧть лун чӧж
Вӧлӧк вуджин,
И ывла вылын швачкӧ тӧв,
Оз пырысь-пыр
Пӧсь чайтӧ пузьӧд,
А сёян йывсьыд
Ов нин чӧв.

И тэныд
Ывласьыс на кӧдзыд
Друг лоӧ сылӧн шоныд горт,
И шуан аслыд:
Сэсся ньӧтчыд
Ог пырав,
Лыяс кӧть мед мор.

Ог радейт,
Коді гӧльӧ пуксьӧ!
Кӧть менам зептын оз ло грӧш,
Но ёрткӧд,
Мыйӧн озыр, юкся,
И сійӧ мекӧд
Юксяс тшӧтш.

СЬӨЛӨМ

Ки пыдӧс вылын
Джуджыд вурыс.
Кор киӧс дойді, артмис тадзи!
А тэныд, сьӧлӧм,
Мыйта сюрліс?!
Но некод
Дойястӧ оз аддзы.

СИР КУРЫД ШОГ

Сир курыд шогыд
Ньӧжйӧ ямӧ,
Век кынман,
Быттьӧ эрд выв бадь,
Кор тэнад абу
Муса мамыд,
Кор тэнад абу
Дона бать.

А кутшӧмджык нӧ
Сылы овны,
Эм кодлӧн мам,
И ловья бать,
Но некор оз кыв
Мамлысь шоныд,
И батыс сылы —
Быттьӧ дядь?!

ПОЗЯЛОМ Ю

Радлунһойлы менам — дор ни пом!
Морһс пытшкын меным сийһс Һзтһ
Жургысь-юргысь юйһ Позялһм,
Кодлһн ваыс синваысь на сһстһм.

Весиг сән, кһн медся джуджыдһн,
Оз, оз дзевсьы некор сълһн пыдһс.
Кор тэ локтан, аддзас тһнад син
Галя изьяс, быттьһ катшашыдһс.

Волһ тулыс, волһ зера ар,
Тыртлывлһны юсһ гудыр шорьяс.
Но сэк сийһ кык пһв тэрыб, яр!—
Сһстһмлунсһ ассъыс няйтсьыс дорьяс.

Уна вояс кывтһ Позялһм —
Нюйтаинтһ некытысь он аддзһй.
Эз Һд прһста коркһ эзысь ком
Мелі юас овмӊдчывлы татчһ.

...Мортлһн олһм — абу сһмын шуд,
Колһ тшӊтш и вуджны нюрьяс вомӊн.
И ме тӊда, олһм оз ло руд,
Ола кӊ ме сідз, кызд Позялһмӊй.

КОЛӊ КУЖНЫ СЕТНЫ ДОН

Талун луныс
Пуксис вывтһ зумыша:
Асывсяньыс кульӊ зэр да слӊт...
Гажтӊмлунӊ —

Йирö быттьö —
Сунышта,
Юрö воö
Уна сьöкыд мөвп.

Бергалöны найö,
Сьöлөм жуглöны,
Зумыд крепость быттьö босьтö враг:
«Мыйла бара
Му вылас и чужлан-а,
Мыйла бара олан,
Сöкъя тшак?!»

Тöдан öд,
Мый коркö век жö эновтан
Шондібана югыд таладор.
Лоö сідз,
Мый быттьöкö и
Эн ов тан
Тэ!—
Код öнi вына,
Ловъя морт...»

Бергалöны мөвпъяс,
Сьöлөм жуглöны...
Колö кужны налы сетны дон!
Кужан кö —
Тэ сэки лоан
Шудаөн.
Он кö — он.

МОЦАРТ ДА САЛЬЕРИ

Лёк завидьлуныс
Ассьыс керис,
Эз нинём отсав:
Яд кисьтис ёртыслы
Сальери,
И эз ло
Моцарт.

«Став слава вичмас
Онi меным»,—
Сальери кайтис.
Но бёрын аддзис:
Коді гений,
Оз кисö
Няйтöсьт.

...Мый гижöма,
Он керышт черөн.
Бур гижöd
Ордьяс лёксö,
И сэки тыдовтчас —
Сальери,
И — Моцарт.

ПИЛЬ ВАНЬЛÖН НОРАСЬÖМ

Ме юа сутки,
Юа мöd,
А мыйла, оз и гөгөрвоны.
А менам лолöй
Чуть оз пöd,

А меным сэтшөм
Сьёкыд овны.

Мед кодкө зиньгө:
«Юсис дзик»,
Мед кодкө горзө:
«Тадз мөй позьө?»
А коймөд —
Шызьөдө став сикт,
Ме вылө няйтсө
Кисьтө водзө.

Ме талун юа —
Пом ни дор!
Коть мый ті сёрнитөй ме йылысь.
Закуска эм на —
Помидор,
Эз быр на вина
Пызан вылысь.

Ва жугөдө пө
Зумыд креж,
А вина —
Жугөдө морт олөм.
И юан туйсьыд кө
Он кеж,
Тэд мөдар югыд
Шуас: «Чолөм!»

Та йылысь төдө
Прөсуж, йөй,
Но шогсө пөдтам вина дозйын.
А шогыд мөдарө —
Оз вөй,
А ещө ёна
Пытшкад ойзө.

Ме юа сутки,
Юа мѳд,
И ещѳ сутки, гашкѳ, юа,
А мыйла юа,
Морт оз тѳд,
А мыйла юа,
Морт оз юав.

ЭСКѳМ

Ме бурас эска,
Вывті ёна эска,
Қыз шонділы,
Қор ылавлывла вѳрѳ.
И водзѳ, гашкѳ,
Нѳшта лоѳ дзескыд,
Но олѳм дінас
Некор ог ло веськодѳ.
Кѳть кутшѳм бушков
Мунас сѳлѳм шѳрѳд,
Оз менѳ сійѳ,
Нинѳмысь оз пѳрѳд,
И олѳмѳй
Оз некор мунлы пась!
Ме бурас эска.
Тайѳ сѳтшѳм гѳрѳд —
Кѳть керав черѳн,
А он разь.

ЧАЛЬ

Мен мортыс вöчис
Ыджыд лёк,
И меным сійö лоис жаль:
Öд тыдовтчис,
Мый сійö — чаль,
А чаллыд певнад
Оз нин ло.

ОГÖ ЛАДМÖЙ

Ми тэкöд, другöй,
Огö ладмöй.
А мыйла,
Тöдан он?
Ми мунам водзö,
А тэ падмин,
Кöть ачыл
Öш кодь ён.

ПОН

Понпиянöс
Шыблалісны ваö.
Гыс найöс вевттис пырысь-пыр.
Сöмын öти
На пиысь эз саяв,
Берегляныс уйис
Никсігтыр.

Визулыс

Пыр водзё сійёс нуис...

И код тодас, лоис эськё мый,

Эз кё юлөн

Паськыд ота туйыс

Недыр мысти

Берег дорё лый.

Чой-вокьяссыс

Колис сійё отнас...

Өні сійё төлка кыйсысь пон.

Вөр-ваті

Төв шёрын,

Арся слотнас

Сыкөд ветлө

Вөравны том зон.

Сөмын войнас,

Ноддя дорын шойчиг,

Понлы усьлө вывті сьёкыд вёт,

Кыдзи сыкөд

Вөялісны орчөн,

И оз эскы,

Ачыс мый эз пөд.

ГОРДА

Төлыс таркнитіс

Ми ордө,

Лэбис лунвылө, код вермис...

Гыяс вылын

Өтка горда —

Киняулас

Джуджыд верви.

Сылөн тшөтшьяяс,
Бур ёртьяс,
Збоя кыпөдчисны вылө.
«Вылысь аддзысьлытөдз»,—
Бордьяс
Налөн өвтисны
Зэв ылөдз.

Дойөн тырём
Сьёлём ойзис...
Юрсө суйис бордйис улө.
Сийө кыліс
Шогсигмозыс:
Воас төв,
И сэки кулө.

Усьны заводитлас
Лымйис,
Сэсса уськөдчылас зэрны...
«Мед көть эськө
Кодкө лыйис,
Водзө терпитны
Ог вермы...»

Сөмын лолыд
Ичөт-ыджыд,
Он тай сийөс сьөвззы, вөлөм. .
Босьтис гордаөс
Сэк пыжа,
Кор нин өдва
Тіпкис сьёлөм.

И көть вөлі
Кулан выйын,
Смертьсыс олөм сийөс дзебис,

Но, а тулыс
Воис мыйӧн,
Тӧдса тыяс вылӧ
Лэбис.

Лӧсьыд овны
Тувсов кадӧ.
Торъя сэк, кор ёнӧсь бордьяс!
...Горда ловйӧн
Колис татӧн.
Бӧр эз воны
Сылӧн ёртьяс.

ГОРД ТУГЪЯСА ПЕЛЫСЬ

Сьӧд енэжын
Изӧймӧм тӧлысь.
А му вылас —
Толаяс тырыс.
Скӧр тӧв улын
Куснясьӧ пелысь
Да, кажитчӧ,
Лым улас тырас.

Тшыг кӧин моз
Омлялӧ тӧлыс,
Ён кӧдзыдыс
Поткӧдлӧ пуяс,
И, кажитчӧ,
Катшмунӧ пелысь —
Тась, олӧмсьыс,
Век кежлӧ мунас.

Но войвылад
Пуяс тшөтш смелось!
Көть дзуртöны
Зэлалöм вужьяс,
Но дзоридзөн
Вöччас на пелысь
Дай сьвкнитас
Биа гöрд тугьяс.

МОЯ ТЫ

Асывнас
Кор кывта ветки пыжөн
Тэнад веркös вывтi, Моя ты,
Бытьö овла
Тэ водзын зэв мыжа,
Весиг ог кыв лэбач дзользьöм шы.

Морös пытшкын
Сьöлöм сiдзи чеччö,
Кажитчö, оз аддзы аслыс ин...
Вөр-ваыслы
Сэтшöм мичлун сетсьö,
Кодысь радлö тöлка мортлөн син.

Сетлöма и тэныд
Енмыс мичсö,
Майбыр, кутшöм паськыд тэнад от,
Берегьяссьыд
Шöвк туруна видзьяс
Уна вояс ытшкис коми морт.

Сöстöм ваад
Овлöм сымда чери,

Кый коть сійос, вёлөм, лун и вой...
Сөмын медся,
Медся дона серыс
Тэнад сэки вёлөма тан мой.

...Өні мойлөн
Весиг абу дукуыс,
Быттьө тані некор эз и вөв.
Но, а тыыс,
Кызди тыртөм юкмөс,
Көні олө
Пельтө вундысь чөв.

ЖАЛЬ ЗЭВ МЕНЫМ...

Жаль зэв меным
Ичөтдырся юйй,
Купайтчывлі көні гожөм чөж:
Тулысьясын
Сідзи өні тулө —
Быттьө сэтчө
Веськавлө ва көш.

Но да нинөм...
Кызкө-мыйкө олам.
Тайө абу медся ыджыд грөз.
Медся ёна
Сыысь босьтө полөм —
Сьөлөмъяснас
Ямөны кор йөз.

Ю ВЫВТИ МУНОМ

Визув ю паньд ме ката...

И. А. Куратов

Ва ньылыд кывтны кокни,
Кор өдйө шлыггө ю,
Сэк тэнсьыд ки ни, кок ни
Оз мудзёмлуныд су.

А кодыр босьтчан катны.
Сэк сьökыд быдөнлы,
И позьö весиг чайтны,
Мый тратшкө сюрса лы.

Кор гыяс кыптылөны,
Да пыжлөн сунлө ныр,
Ме думыштла: ок, öни
Тан вöя пырысь-пыр.

И чеччыштны нин кöсья —
«Оз артмы нинöм — пом!»
Но сэсса шуа пöся:
«Ме ставсö вена — том!»

И бара босьтча уджö,
Кöть пыжын джынйыс ва.
Мед талун этша вуджа,
Öд аски позьö на.

Да, олём юыд вына,
Он öти пелыс чег.
...Ми быдөн ас ног сынам,
А юыс гыа век.

ВЕТКИ ПЫЖ

Ю вывтї лэбб
Ветки пыж,
Веж гыяс окалёны сійёс.
Пыр тёдчө,
Абу кокни кыш,
А пыж,
Код вöчсьö мастер киён.

Дзик быттё чача,
Абу рыж,
Кор пыжыс йöктö гыяс вылын!
А берег дорын
Сійö сідз жö пыж,
Но сэк
Ог завидьты ме сылы.

ПРАЗДНИК ЛУН

Зэв ыджыд аттьö тэныд,
Праздник лун.
Но лунъясыслы тэöдз —
Муöдз копыр!
Öд найö кө
Эз венны съöкыдлун,
Тэ гөститін ме ордын,
Гашкө, кодыр?..

ÖТҚАЛЫ

Мед тэнад пасьтаыд —
Кык сыв.

А судтаыд —
Көть енэж йирөдз!
Тэд доньд грөш,
Кор пи ни ныв
Он коль ас бөрад
Тайө мирас.



Ошкөны —
Радлы, другой,
Олөмтө водзө тэч.
Видөны —
Эн ло дзугыль,
Юртө эн улө лэдз.

Некод кө
Кыв оз шу тэн,
Быдөн кө олө чөв...
Овнытө
Сідз-ө кутін,
Думыштлы уна пөв.

КӨТЬ И ЭТША НА ОЛА

Көть и этша на ола,
Но и вичмыліс меным
Уна лёкин да тола
Аслам олөмын венны.

Да и ковмас на водзө...
Мыйсө олөм оз дасьты!

Венны унатор позьё,
Медся сьёкыдыс — асьтё.

ВИДАСНЫ КӨ МЕНӨ

Видасны кё менё,
Пыр ог скөрмы,
Наян морт моз
Йёз вылас ог дуд.
Шуа аслым:
«Джёмдыны, дерт, верми,
Гашкё-й, овны
Бур ногөн эг кут».
И став мыжсё
Медводз корся асысь,
Та бёрын нин сёмын
Мукёдьясысь.

КОДИ КУТШӨМ — СІДЗИКӨН И ОЛӨ

Коді кутшөм —
Сідзикөн и олё!
Ю веркёсын ёсыд — гыбзьё тыр.
Джуджыдинё
Нырсё сюйны полё:
Гегда пё ме сәні
Пырысь-пыр.

Та вёсна и найёс
Векджык аддзё
Вуграсьсысь,
Но некор тай оз кый:

Татшөм чери
Гортад нуны
Яндзим,
Пыста кокысь быттьö —
Наысь вуй.

Чеччалöны ёсьяс
Радлігтырйи,
Панöмаöсь быттьö ыджыд пир
Чайтöны,
Мый ёсыд медся гырысь.
Сöмын эм на чир
Дай сывъя сир.

СТЕН САЙЫН

Стен сайын
Сьылöны да йöктöны,
Сэн талун сэтшөм ыджыд гаж,
Дзик быттьö вöвъяс
Гөнитöны-рöдтöны,
А гудöк ворсö —
Дзуж да дзаж.

Сэн талун йöзыс
Вывті шудаöсь.
На пиысь быдөн пöт и код.
Код вöлі шыр кодь,
Лоис удалөн,
Мöд тшынасьö —
Кыз пароход.

А коймöд —
Сьылö моднöй ария:

«Тэ менам мусук, менам кань...»

А том стияга
Йöктö-жаритö,
А плешка —
Нюлö эзысь пань.

Стен сайын
Сьылöны да йöктöны,
И меным юрö воö мöвп:
«А, гашкö, керкаыс
Тшöтш рöдтö нин,
Кыз домöд йылысь
Мынöм вöв?..»

Ме радейта жö
Йöктöм, музыка.
Но талун мыйкö босьтö шөг.
Сы вöсна, гашкö,
Мый зэв кузя нин
Сэн йöзыс
Йöктö-песö кок.

А гашкö, сы вöсна,
Мый татöни
Тшöтш вөрö быдөн миян джодж,
А чöv-лөнъ корö
Висьысь батыным...
Кöть стенсö выльысь
Босьт да потш.

Код тöдас,
Кор на гажыс помассяс?..
Но, дерт жö, коркö воас пом.
А öни меным
Дона донасьыс

Сук парма шöрын*
Öтка чом.

КАД

Велалім думайтны сідзи:
«Олöмын зэв уна лун,
Талунья лунсö кö видзи,
Аскиа — прöста оз мун».

Кадсö тадз, ёртьяс, ми воштам,
Асьнымöс öлöдам кор.
Бöрынджык бөр эськö босьтан,
Сöмын тай овлö нин сёр.

ТÖДА

Ме тöда:
Пиöй лоö шуда,
Оз усь сы вöсна менам юрöй,
Ме сійöс
Быдтыны кö кута
Ог кызкö-мыйкö —
Тöлкөн, бура.

Но лоö
Нöшта шуда сійö,—
Оз вичмы сымда лёкыс, лёжыс!—
Кор асьыс челядь —
Нылöс, пиöс
Бур ногөн быдтас
Унджык йöзыс.

МАМ ДА ПИ

Быд письмөторйын
Писö корліс мамыс:
«Тэ, пиук, воы,
Пуа чöскыд сур...»
Тадз воысь-во!
Лöз Эжва туліс, ямлис,
А пиыслы век
Прöст кадыс эз сюр.

Но век жö öтчыд
Воис чужанінас.
Сэк вöлі гожöм.
Луныс — шоныд, рам...
Но некодлы нин вöлі
Писö шуны пинас,
И некодлы нин вöлі
Шуны: «Мам».

БЫД ЁЛЬ КÖ ВЕРМИС ЮÖДЗ ВОНЫ

Быд ёль кö
Вермис юöдз воны
Да сетны сылы ассъыс вын,
Сэк ляпкыдінъясыд
Эз лоны,
А вöлі джуджыд
Быдлаын.

Быд морт кö
Оліс сідз, кыз колö —
Эз визув ёлысь нюрö пöр,

Дерт, эськө бурджык
Вөлі олөм:
Эз кодкө доймы,
Шогсы,
Бөрд!

СЕРНИ

— Тиян войвылыд көдзыд, лым...
Абу менам кыз лунвыв гортөй,
А тэ мыйлакө ачылдым,
Сьөкыд кадө мен лоин ёртөн.

— Чужаніныд өд, дона гөсть,
Сійө көдзыд көть кутшөм — дона.
Но, а сьөлөм кө менам пөсь,
Гашкө, кынмавлі ачым ёна.



Кольөм вося лызь туй он нин вудж,
Коді чукльөдлөмөн муніс кыддза расті...
Талун кө тэ эн вөч ассьыд удж —
Өдвакө нин вөчны верман аски.

БЫД МОРТЛӨН АСЛАС ДУМ

Быд мортлөн аслас дум,
Қор сійө пикө волө.

Со өти ёртлөн оз пет нюм,
Пыр зумыштчөмөн олө.

Мөд бөрдө ичөт кага моз,
Ва нылыд сійөс нуө.
Со бара ньөбис вина доз
Да лунтыр дінгө-юө.

А коймөд оз тай өшөд ныр,
Оз вөйысь морт моз шенась.
Век өти лача кутө пыр,
Мый бурыс лёксө венас.

ДА, ЁРТЪЯС, ОЛАННЫД ТІ БУРА

Да, ёртъяс,
Оланныд ті бура!
Ме шай-паймуні, вомөй — кальк:
Машина, дача, гарнитурыд...
И зарни паньяс,
И хрусталь.

Ті вөсна шемөс
Менө босьтіс:
«Оз тырмы сөмын чипан йөв».
...Ми бурджык другъяс
Вөлім водзті,
Қөть татшөм озырлун
Эз вөв.

ВЕК ВӨЧА ТАДЗ

Кор меным
Паныд сувтас лёкыс,
Мый миян олёманым эм,
Ог кытшовт сійёс,
Ог кеж бокё,
Көть дойдас сьёлём
Сійё мем.

Век вөча тадз —
Туй ог сет сылы,
Өд бура төда өтитор:
Ме лёксё лэдза,—
Вичмас пины,
Ас олан туяс
Петас кор.

●

Со колис лун, и пуксис вой,
Дзик ставыс гөгөр лөнис.
Ни сьёкыд мудз, ни сьёкыд дой
Оз торкны мортёс өні.

Но мунас кад, и асывводз
Бөр асьыс пайсё босьтас.
И сэки, кыдзикөн и водз,
Морт бара синсё восьтас.

И бара удж, и бара лун,
И быдсямаыс лолё.
И таысь некытчө он мун,
Өд тайё шусьё — олём!

А МӨД НОГ ОВНЫ ОЗ ПОЗЬ МИЯН

Көть кутшөм
Сьөкыдлун оз топөд,
Көть кутшөм лёклун
Сөтас тэн,
Век водзё нырчы,
Дона вокөй,
Няр жугыльлунтө
Ассыд вен.

Өд миян мөд ног
Оз позь овны,
Со миян быдмөны
Кык пи,
И мыйөн
Сөстөмджыкось ловным —
На водзын
Прамөйджыкось ми.

Ог кутөй мөвпавны
Сы йылысь,
Ми дыр-ө
Олам-вылам тан,
А олам сідз,
Кыз сьөлөм кылө,
Кыз миян дедъяс —
Кык Иван.

Бур йөзыс
Помнитөны найөс,
Көть мыйта
Визувтис нин ва...
Жаль,
Дженьыд налөн

Олан пайыс —
Кык сьөлөм
Косьөбтис война.

...Мед сьөлөм
Ыпьялас яр биөн,
Ми водзын
Вывті ыджыд мог.
А мөд ног овны
Оз позь мяян,
Да, оз позь некыз,
Дона вок.

ПОП ВАСЬ

Мортлөн сямыс
Уна пөлөс.
Быдөн вөчны мыйкө дась!
Вөлі шызывлө
Став вөлөсть,
Сьывны горөктас кө
Вась.

Сылөн гөлөс
Юракылө,
Овлө гажа, овлө нор:
Радлун волас
Сьөлөм вылө,
Чукыртчывлан
Синвасор.

«Но и гөлөс,—
Шулис йөзыс,—
Енмыс сетлөма жө сям.
Жаль,

Мый велөдчыны өдзөс
Гөльлы тувъялөма —
Кам-м-м!!!

Вермас Васьыд
Лоны попөн,
Сюрас грамота кө, дерт.
Сөмын, тыдалө,
Ми воклы
Сирөд мыръяс
Кувтөдз берт...»

Васьө мукөдьяс моз
Вартіс,
Ытшкис, чөвтіс, лэдзис кер.
Олөм сідзи
Сійөс гартіс —
Эз и югдыв
Олан сер.

Мича гөлөс
Сідзи-й йывмис.
Нэмсө тыртөм вөлі ноп.
Но, а сы вөсна,
Мый сьывліс,
Нимыс дінө содіс
«Поп».

Тадзи виньгыртісны
Чөла
Қоми пасьта кымын Вась?..
...Мекөд эськө
Тадз жө вөлі,
Эз кө пуксьыв
Сөвет власть.



3

**Менам радлун,
менамойд**



ЗЭРИГӨН

Ме тэнö сэки эг и оков,
Ме тэнö сэки эг и кутлы.
Ми мунім, кыдзи чоя-вока,
И дзоридз көрөн өвтис луд выв.

Ме тэныд өкті катшасинъяс,
А сэссия... ок, и ёна зэрис...
Мен тэнсьыд мелі чөдлач синъяс
Со бара казытис югыд зэрыс.

ПЕРВОЙ МУСЛУН

Быдөн динö волö первой муслун,
Быдөн кывлö сёлöмыслысь дой.
Сийö дойыс дыркодя оз куслы —
Узытөг кольö лыдтөм-тшөттөм вой.

Думайтан сэк сөмын өти йылысь,
Коді торкис тэнсьыд чөскыд ун.
Думайтан да казытылан тэ выльысь,
Аддзысинныд кыдзи — первой лун.

Қажитчө, мый сытөг здук он вермы
Нюжөдны тэ ассьыд шуда нэм,
Но он төд, он төд, мый колө керны,
Медым сийö кисö мыччис тэн.

Первой муслун быдөн динö волö,
Сийö сөстөм, кыдзи вөрса ёль.
Сөмын татчө пасйыны тшөтш колö,
Мый оз быдөн пиын сийö коль.

ТЭНӢ КОЛЛЬӢДИ

ТэнӢ колльӢди
Кодзула войын,
Ставнас эзысьӢн
Дзирдаліс сикт.
Дзуртіс лым...
Тэнад керкаӢдз воим,
КолӢ янсавны —
Ог вермӢй ми.
Бара котӢртам
Сикт мӢдар помӢдз,
Сэссия окыштчам сералігмоз.
Тэнад банйӢма чужӢм,
А вом дор —
БытьӢ гожӢмын
ҚисъмӢма оз.
Тола эшкынын
Керкаяс чӢлӢсь.
Лунся мудзӢмсӢ
ПальӢдӢ му.
ВӢтчӢ ми бӢрся
ҚӢвдум кодъ тӢлысь,
СӢмын миянӢс
Некыдз оз су.



ЧастӢ овльвлӢ сідзи,
ЫзгӢ вына лӢз гы,
Но друг ар воас — йизьӢ,
И оз кыв сылӢн шы.

Муслун ыпйö яр биён,
Но друг чизыртас пуж,
И сэк тыдовтчас мян,
Сылөн пыдын-ö вуж.

МЕНАМ РАДЛУН, МЕНАМ МОЙД

Ывла вылыс лымъя — кöдзид,
Оз нин тыдав мулөн чут.
Тэныд колис поездöдзид,
Муса нылöй, вит минут.

Еджыд пухысь юрад чышъян,
Бандзиб вылад синва войт.
Регыд менö колян, пышъян,
Менам радлун, менам мойд.

Кадыс ассъыс туйсö венö,
Сійöс нинöмөн он кут.
Нöшта öтчыд кутла тэнö,
Сэсся бур туй да бур шуд.

Поезд төвзис...

сьöкыд вывтi!

Ставсö водзвыв төдан кысь?
Быттьö мунiс сьöлöм вывтi
Нылöс нуысь поездыс.

УНА-Ö МЕНЫМ КОЛÖ

Уна-ö меным колö?
Этша зэв — ичöтиктор:

Юөр мед тэсянь век волө,
Ылыи овлывла кор.

Төді мед мартын, июлын —
Ловъя тэ, шуда на пыр.
Сэсса көть сьөд зэр мед кульө —
Радлунөн олөмөй тыр.

ВЕЖСИС ВОЙВЫВЛӨН РӨМ

Вежсис войвывлөн рөм,
Бара гөститө тулыс.
Сявкйө-дзордзалө льөм,
Эжва сикт бердөдз туис.
Сөстөм енэжлөн йир,
Шонді югөрсө ыстө.
Лунтыр асывсянь пыр
Дзользьө-гажөдчө пыста.
Бара ставыс тай сідз,
Кыдзи кольөм во вөлі,
Гөгөр вөр-валөн мич,
Тіпкө тшөкыда сьөлөм.
Сөмын мыйкө тай оз
Меным, буракө, тырмы...
Ог нин коркөя моз
Вермы тэ ордө пырны,
Шуны некымын кыв,
Тэныд козьнавын дзоридз...
Тэ өд медводдза ныв
Инмин сьөлөмөй дорөдз.
Тэкөд торъялім ми
Көдзыд сьөд зэра арын.
«Эм кө сьөлөмад би,

Регыд аддзысям бара»,—
Тадзи шулін тэ мем,
И ме виччыси век өд,
Но эг йитöй тай нэм,
Кыдзи көсйысьлім тэкөд.
Ми эг аддзысьöй, эг,
Дзикөдз торъялім, нылöй!
Таысь тулыснас век
Сьөлөм доймөмöй кылө.

ТУЛЫСЫС КӨ ВОЙВЫЛӨ ЭЗ ВОЛЫ

Тулысыс кө
Войвылө эз волы,
Ывла вывсьыс лымйыс
Эз и сыв,
Колип,
Коді көдзыдлунсьыс полө,
Енэж дзибйын эськө
Эз жö сыв.

Тулысыс кө
Войвылө эз волы,
Бура тöда,
Олім эськө сідз:
Сыланкывтöг
Лун-войсö пыр коллим,
Эгö аддзöй
Дзоридзьяслысь мич.

...Тэ кө меным
Эн ло öтпыр паныд,
Татшөм шуда

Өнөдз ме эг вөв,
Сьөлөм вывтi,
Кыдзи тундра банөд,
Ветліс эськө сөмын
Көдзыд төв.

ВЕТЛІ ЫЛЫС ВИДЗЬЯС ДОРӨДЗ

Ветлі ылыс видзьяс дорөдз,
Кадыс эз вош весь.
Вайи тэныд ки тыр дзоридз,
Муса нылөй, сэсь.

Тэ друг быттьө өзйин-ловзин,
Нюмьёвтыштін мен,
Сэсся шуин: «Мича козин,
Аттьө, зонмөй, тэн».

Меным долыд вөлі збыльысь,
Юрын чужис дум:
«Аски ветла на ме выльысь —
Аддза тэнсьыд нюм».

ГОЖӨМЫС ЭНОВТАС МЫЙӨН

Гожөмыс эновтас мыйөн
Миянлысь войыввса му,
Көдзыдыс дорас кыз йиөн
Парматі визувтысь ю.

Сыкөд, код меным зэв муса,
Коркө кө торьялам ми.

Кадыс —

Гөгөр дзоридзалө льём,

Вежөдөны видзьяс юяс пөлөн.

Ставыс казьтө

Чужан мулысь рём.

Таысь ещө ёна

Доймө сьёлөм.

Луныс —

Бытгьө войталө мөс вый.

Самолётгьяс кыпөдчөны крута.

А ме тани...

Вөчан сэссия мый,

Торьялөм кө

Крепыда зэв кутө.

Төда —

Лэбас луныс уна дас,

И ми бара тэкөд лоам орчөн.

Сьёлөм вылысь

Вушгьяс курыд пас,

Олөмнымөс мөдам

Тэчны водзө.

Мича лун,

А сэтшөм гажтөм мем...

Торьявны мөй миян вөлі колө?..

Мортыд шуда,

Вөлөмкө, век сэн,

Көні сійөс

Радейтысьыс олө.

МЕЛІ ҚЫВ

Ме тэкөд оліг,
Муслун биын сотча.
Став миян олөм —
Қыпыд сыланкыв.
Но мыйлакө тэ кывлан
Вывті шоча,
Кор тэныд, мусук,
Шула мелі кыв.

Код таысь мыжа?
Дер жө, ачым — төда!
Ме думайті,
Мый муслуныд кө эм,
Тэ сідзи мекөд
Бура овны мөдан,
Көть мелі кывйыд
Шоча вичмас тэн.

Ме дінө некор
Тэ эн вөвлы веськодь!
Но унджык на кө песті
Мелілун,
Тэ чужөм вылысь
Нюм да серам эськө
Эз, гашкө, быд лун
Сэтшөм өдйө мун.

Морт сьөлөм...
Сійө вывті уна корө,
Көть висьтавысьө
Веськыда оз куж.
...Мед мелі кывным
Мусукъясным дорө
Век лоө миян,
Қынтывлас көть пуж.

●

Тэ кӧ мекӧд орчӧн —
Медся шуда кад.
Морӧс пытшкӧй сотчӧ,
Сьӧлӧмӧй зэв рад.

Тэ кӧ меысь ылын —
Торъявлывлам ми.
Сьӧлӧм менам сылӧ,
Кыдзи вӧсни йи.

МЫЙЛА ТАДЗИ?

Кыдзи видзӧдла, бытгӧ ставыс
Менам олӧмын шыльыд-бур.
Ӧти кымӧртӧм небесаыс,
Но вот мыйлакӧ гаж оз сюр.

И ме мӧвпала: мыйла тадзи?
Но ог некыдзи гӧгӧрво.
Гашкӧ, сы вӧсна, мый ог аддзыв
Тэнӧ, мусукӧй, бара во.

●

Ӧшинь стеклӧ кымӧсӧн
Сывда — ӧти дум:
«Ыстас оз мен письмӧсӧ,
Колис кымын лун?..»

Ме өд сійөс радейта,
Сы вөсна и тадз
Сэтшөм ёна надейтча,
Мый оз вунөд швач.

Ошинь сайын лымъялө,
Лым чир лэбө тыр...
Сьökыд думöй ылавлө.
Тайöс аддзигтыр.

Казьтö меным войвылөс
Еджыд ывла выв.
Тэ динö кыз волывлі,
Менам муса ныв...

ТӨВЗЬӨ-ЛЭБӨ ТАКСИ

Төвзьө-лэбө такси,
Сьод асфальт, быттьö мавтöма сирөн,
Кольö туй индан визь,
Коді пасйöма еджыд пунктирөн.

Кыліс другысьөн — быз-з-з!
Стеклö вылысыс ва чутьяс öктö,
Тайö көлесаыс
Вылысь, тыдалö, веськавліс гөптö.

Киын дзоридз букет,
Лоö мусуклы любö, дерт, таысь,—
Пола: эз усь көть мед,
Быттьö вöчöма вөсни хрустальысь.

Со и аэропорт,
Пуксис-лайкмунис төкөтьö «Ту»-ыд...

Менам медмуса морт,
Вайис ме дінө вöлисти туйыд.

Олін войвылын тэ,
Оз сыв сёр тувсов пöраөдз лым көн,
Ассьыд пöсь муслунтö
Тэ эн кусöд — и бара ми кыкөн.

И ме висьтавны рад
Став Му шарывса йöзыслы öнi,
Мортлөн медшуда кад,
Сийöс крепыда кор радейтöны.

Тövзьö-лэбö такси,
И быд морт эськö ме моз жö шуис:
«Кутшöм шудаöсь ми,
Мый эм олöмас аддзысян туйыс».

●

Став лёксö
Колям ылö-бөрö,
Став бурсö сöмын босьтам аскöд,
И бара тэкöд,
Сьöлөмшөрöй,
Ми мунам тöдса
Кыддза раскöд.

И бара шондi
Важ моз петас,
Тыр зарни кисьтас мяян ылö,
И тайö ыджыд,
Вöльнöй светас

Ми кылам
Сьёлөмъяслысь сьылөм.

ТЭ МЕНӨ ПИНЯВЛАН ОН ӨТПЫР

Тэ менө пинявлан он өтпыр,
Но ме век тэкөд — ог тай мун.
Кор скөрман, пөся шуа: «Гөтыр...»
И петас чужөм вылад нюм.

Көть тэ и венө мекөд волан,
Мед!

Тайө абу на зэв лёк.
А лёкыс сэк, кор чөв тэ олан,
И мян костө быдмө ёг.

И ТАДЗИ ОВЛӨ

Ме матыстчыны ныв дорө эг лысьт,
Өд медся мича, мися, сиктын тайё.
А өні көть и матыстчан да... кысь?!
Кор петөма нин важөн верөс сайё.

ОН НИНӨМ ВӨЧ

Он нинөм вөч,
Он нинөм вөч,
Ми тэкөд аддзысим зэв сөрөн!
Көть вөлім

Ота-мөдлы стөч —
Веж видзвывса
Кык мича дзоридз.

Но артмис сідз,
Но артмис сідз,
И тайё збыль, а абу вётын:
Мөд водзджык аддзис
Тэнсьыд мич,
И лойн сылы
Муса гётыр.

И тэныд шог,
И меным шог,
Мый артмис олёманым тадзи:
Тэ дінё ас кадё
Эг лок,
Тэ менё ас кадё
Эн аддзы.

ОН КИССЬӨМ ВАТӨ КУРАВ

Да, өні он,
Он киссьөм ватё курав...
Тэ сэки ышмиг петін верёс сайё,
И чайтін, дерт,
Мый овны кутан бура,
Мый тэнсьыд шудтё
Кымөр чир оз сайёд.

Зэв унатор
Сы кадсянь өнөдз вежсис,
И ылысмис, мый коркё вөлі матын,

И муслун ордым
Баддьөн тырис-эжсис...
Ме гөтраси жө.
Ачым лои батьөн.

И колө жө
Та бөрын сідзи лоны:
Ми аддзысим, а тэнад — синва тюрө...
И менам сьөлөм
Топавлө жө ёна,
Да өні он,
Он киссьөм ватө курав.

ШУДТӨМ МУСЛУН

Мый сійө
Окасьлывліс мөдкөд,
Мый тэнө ылөдлывліс,
Төдан.
Қор сійө орччөн —
Видан-сөткан,
А сытөг —
Войбыдъясөн бөрдан.

МЕНӨ ЙӨЙМӨДІС ТЭНАД МИЧ

Менө йөймөдіс
Тэнад мич,
Сьөлөм ыпнитіс
Муслун биөн.
Эг кут ачымөс,

Артмис сідз:
Лои тэ водзын
Кутюпиён.

Эски дугдывтөг
Лун и вой,
Мый тэ радейтан
Сёмын менё.
Но друг козьналін
Сэтшөм дой,
Кодёс сьёлөмыд
Шоча венё.

Вёлөм мусаджык
Мөд морт тэн,
Коді меысь на
Збойджык варыш...
Мыйла, мусукөй,
Сідзкө, эн
Меным та йылысь
Водзвыв гарышт?

Ме өд эг эськө
Тадзи вись
Да эг мучитчы,
Кызди өні.
Водзджык прөйдитіс
Эськө визь,
Пырны код сайё
Вунөдөны.

ТЭ СІДЗИ ЭН И ГӨГӨРВО

Да, кольо вояс бөрся во,
Но мено мөвп век вено:
«Тэ сідзи эн и гөгөрво,
Кыз радейтлі ме тэнө».

Мый сьолөм менам вөлі пым,
Тэ сідзи эн и казав.
Эз кытчөдз торьялөмлөн гым
Став йитөдьяссө разав.

ЭГ КУЖ

Ме аддзи өтпыр сэтшөм мича из,
Код пөртмасис дзик өшка-мөшка рөмөн.
Но кодкө менсьым сійөс гусяліс,
И колис сыысь казтылөмыс сөмын.

Ме сэки эг на сэтшөм төлка вөв,
И донаторйөс пункті вывті матө.
А бөрас видлі корсьны уна пөв,
Но он тай курав джоджсьыд киссьөм ватө.

Тадз, изйыс моз, ме вошти муса нылөс,
Сы бөрын уна паныдавлі вильөс,
Но ыджыд муслун на дінө эз чуж.

И өні менө өти мөвп век виө,
Мый шудөй менам вөлі аслам кыын,
Но сійөс бура видзнысө эг куж.

ЭН ВӨТӨД

Эн ме вылө скөрпырысь видзөд,
Эн ас кежсьыд гусьоник ёр.
Эм мөд менам. Төдан тэ, сідз өд?!
Ме муна, мед лыяс көть мор.

Эн вөтөд, көть ыпъялан биён,
Ме тэ дінысь ылыстча кор.
Ме көсья, мед кутін тэ киад
Дзонь шуд, а эн шудыслысь тор.

МЕ ÖД, МУСУК, ЛОВЪЯ — АБУ КÖРТЫСЬ

Бокö кежлөм мөдлысь аддзам ставөн,
Сөмын огö аддзöй ассьыным...
Гашкө, тэ и, збыльысь, вöлін правөн,
Скөравлывлін кодыр, кызди гым.

Менам эськө эм пыр öти лача —
Медым олөм эз вöv некор дзуг.
Но век овлө, вылө-вылө кача,
Сэсся изйөн увлань уся друг.

Төда: олөм овны абу кокни,
Абу ыб выв вуджны сйö, збыль.
Сөмын венан туяд öти лёкин,
Тэнö водзын виччысьö нин выль.

Ме öд, мусук, ловья — абу көртысь,
Ставыс мунö менам сьөлөм пыр.
Эн жö, сідзкө, судит вывті скöрысь —
Оз öд нинөм артмы пырысь-пыр.

НЫВЪЯС

Страдна дырйи
Лэдз сӱмын
Найӱс ватӱ юны,
Купайтчӱны-резсӱны
Нывъяс ыркыд юн.
Бузӱдчӱны-ворсӱны,
Радлунныс оз личав.
Вот сӱсса и
Корсь ӱни,
Коді медся мича.

ВАЛЯ

Ме ассым олан туйӱс водзӱ таля,
Да унджык йӱзӱс тӱдмала ме пыр.
Со орчча сиктын олӱ нывка, Валя,
Оз кызкӱ-мыйкӱ, бура, сьылігтыр.
То сійӱ нуӱ куканьяслы турун
Да вомгорулас сьылӱ сьыланкыв.
Ме эг и тӱдлы, кызди чужис юрын
Дзик ӱти мӱвп, мый тайӱ шуда ныв.

А збыль вылас... Ме тӱдмалі нин бӱрас,
Мый сьылӱн дой эм ӱти сьӱлӱм шӱрас:
Медмуса мортыс муніс мӱдарлань.

Но оз тай эрдӱд сійӱ шогсӱ ассыс,
Та вӱсна сӱмын кылан мукӱдьяссыс,
Мый тані сійӱ медся шуда ань.

ЮРИНДАЛЫСЬ

«Гажа овны быд вожын» 3

1. МЕ ЧУЖИ ВОЙНА БÖРЫН

Кöть вöлі на ме ичöт	6
Обö	6
Ме чужи война бöрын	7
Муса мамöй, шондібанöй	8
Кыр йыв Öльöксан	9
Ок тэ, муса челядьдыр	11
Висьтавлывлö бабö	12
Виччыся мамöс	13
Арся лун	14
Воис тöв	15
Рытья школа	15
Шляча	17
Ме Ленинградын öнi ола	17
Тэрмасыя гортö	18
Коми йöз	19
Ми тэкöд	20
Коми кыв	21
Кор локта аслам сиктö	22
Страдна	23
«Асывводзнас аски чечча водз»	24
Он сувтöд воястö	25
Бабö	26
Кор гöстита ме рöдвуж ордын	27
Ок, Эжва, Эжва	28
Видз вылын	28
Дед	29
Шофёр	30
Африкан	31
Некрасов вад	32
Тшака зэр	33
Шондібан	34
Ме бытьö тöрыт вöлі ичöт	35
Содтöд пасья	35
Гöрд обелискъяс	36
Тайö меным и шуд	37

2. БИА ГӨРД ТУГЪЯС

Олөм	40
Ми чужам	40
Озырлун	41
Век найö бурöсь	42
Сöвeсть	43
Ог радейт	44
Сьöлөм	46
Сир курыд шог	46
Позялом ю	47
Колö кужны сетны дон	47
Моцарт да Сальери	49
Пиль Ваньлөн норасьöм	49
Эскöм	51
Чаль	52
Огö ладмöй	52
Пон	52
Горда	53
Гöрд тугъяса пелысь	55
Моя ты	56
Жаль зэв меным	57
Ю вывті мунöм	58
Ветки пыж	59
Праздник лун	59
Öткалы	59
«Ошкöны — радлы, другöй»	60
Кöть и этша на ола	60
Видасны кö менö	61
Коді кутшöм — сідзикөн и олö	61
Стен сайын	62
Кад	64
Тöда	64
Мам да пи	65
Быд ёль кö вермис юöдз воны	65
Сёрни	66
«Кольöм вося лызь туй он нин вудж»	66
Быд мортлөн аслас дум	66
Да, ёртъяс, оланнуд ті бура	67
Век вöча тадз	68
«Со колис лун, и пуксис вой»	68
А мöд ног овны оз позь миян	69
Поп Вась	70

3. МЕНАМ РАДЛУН, МЕНАМ МОЙД

Зэригөн	74
Первой муслун	74
Тэнö колльöдi	75
«Частö овльвлö сiдзи»	75
Менам радлун, менам мойд	76
Уна-ö меным колö	76
Вежсис войвывлөн рөм	77
Тулысыс кө войвылö эз волы	78
Ветли ылыс видзьяс дорöдз	79
Гожöмыс эновтас мыйөн	79
«Ме тэнö кузя, чöскыда зэв оқышти»	80
Чужанiнысь ылын	80
Мелi кыв	82
«Тэ кө мекöд орччөн»	83
Мыйла тадзи?	83
«Öшинь стеклö кымöсөн»	83
Төвзьö-лэббö такси	84
«Став лёксö колям ылö-бөрö»	85
Тэ менö пинявлан он öтпыр	86
И тадзи овлö	86
Он нинөм вöч	86
Он киссьөм ватö курав	87
Шудтөм муслун	88
Менö йöймöдiс тэнад мич	88
Тэ сiдзи эн и гөгөрво	90
Эг куж	90
Эн вöтöд	91
Ме öд, мусук, ловья — абу көртысь	91
Нывьяс	92
Валя	92

Александр Васильевич Некрасов

КРАСНОГРОЗДНАЯ РЯБИНА

Стихотворения

На коми языке

Художник В. Б. Осипов.

Рецензенты В. В. Тимин, С. А. Попов. Редактор В. А. Попов. Технический редактор А. Н. Вишнева. Корректор В. И. Трошева.


ИБ № 655

Сдано в набор 05.10.82. Подписано в печать 26.01.83. Ц00374. Формат 70×90¹/₃₂. Гарнитура литературная. Печать высокая. Бумага мелованная. Усл. печ. л. 3,51; усл. кр.-отт. 3,66; уч.-изд. л. 3,51. Тираж 2000. Заказ № 8514. Цена 50 коп. Коми книжное издательство, 167610, Сыктывкар, ул. Карла Маркса, 229.

Республиканская типография Государственного комитета Коми АССР по делам издательств, полиграфии и книжной торговли. 167610, Сыктывкар, ул. Коммунистическая, 20а.



50 коп.



КОМИ
КНИЖНОЕ
ИЗДАТЕЛЬСТВО
1983